

前代禦寇良規



前代禦寇良規

目次

一・通論

二・保甲

三・團練 附勤務賞罰


四・碉寨 水棚 守禦器械

五・積穀 經費



~~210710~~

上海图书馆藏书



A541 212 0021 8394B

# 前代禦寇良規

流寇飄忽無定。裹脅良民，焚燒劫殺。城鄉爲墟。以強大之官兵。經年累月。而莫之能制。轉爲所困。非獨今時赤匪爲然。固無足奇。亦無足爲畏。展讀舊載。除曾胡平捻已有專載外。其餘苦於流寇。籌謀對策。可資爲今日吾人師法。而見諸載籍者尙多。茲擇其裨於實用者。節錄之以供參考。

蔣中正誌

## 一。通論

清龔景瀚云。州縣之有鄉村。如樹之有枝葉。枝葉傷。則根本無所庇。鄉村皆爲賊所蹂躪。其城郭之不亡者僅矣。今四面皆有堡寨。障蔽

擁護。賊必不敢徑犯城郭。有急則環而救之。賊將腹背受敵。况官兵又乘其後乎。

清許乃釗云。守城不如守鄉。嘉慶初年。平定三省教匪。堅壁清野。

卽是鄉守之意。又云。團練之法貴合。保甲之法貴分。分則察奸之耳目易周。合則守望之人心自固也。然必保甲行而後團練可舉。卽遇大災大役。皆可從此就理矣。有馭衆之責者。不可不明分方之用也。又云。鄉守之法。貴乎聯絡聲勢。固結人心。故併小村入大村。聯衆志爲同志。其道主於合也。惟此法獨主於分。(指周台公分方法)蓋人烟稠密之處。奸宄易藏。分方之法行。則良莠別。而煩顛理矣。故不合則勢渙而難收。不分則事冗而無緒。兩者宜互相爲用。清福珠隆阿云

。鄉守卽古寓兵於農之意。其法以保甲爲主。而團練副之。又云。保甲乃使境內之奸宄無所容。團練乃使外來之寇盜無所犯。兩者相互爲用。然保甲有成法。團練無成書。（按福爲清道光時人）其見於前賢集中者。不外貧効力。富戶捐資。零戶則併諸大村。器械則編成字號。以民助兵。卽以鄉衛城。（按貧効力富捐資歸併小村烙印器械確爲團練精髓）

德楞泰奏請築堡禦賊疏有云。伏查教匪自上年至今。竄及數省。雖各路勦殺。爲數以千萬計。而首逆尙未成擒。餘黨不形減少。實緣各賊始尙據險屯聚。得以合圍進搗。近日則東奔西竄。無久占之地。無一定之所。以劫掠爲生。行不必裹糧。住不藉棚帳，黨與不待征調。蹂

躡數千里。飄忽無常。臣等追賊。自楚入陝。經過被擾村莊。有房屋爲賊所焚燬者。有蓋藏一切爲賊搜劫無遺者。有男婦人口爲賊擄脅前去者。堪憫情形。一言難盡。（按流寇之害古今同慨）此時已經被擾之處。急須安頓撫恤。未經被擾之處。急須布置堵勦。使賊無從劫掠。而後可以衛民而困賊。查各州縣在城之民。有城池以資保障。其村莊市鎮之散處者。僅恃有一二隘口。鄉勇防護。或相離較遠。猝然遇警。不及應援。或山路分岐。設堵未遍。賊已闌入。年餘以來。百姓往往一聞賊至。倉惶匿避。糧食衣物卽爲賊有。其奔稍後者。則既劫其物。並擄其人。甚至備禦之火藥器械。反以藉寇而資賊。而各賊每至一處。有房屋以棲止。有衣食以接濟。有勾結逼脅之人。爲之引道

路而供負戴。是以兩載用兵以來。各省勦殺無慮千萬。而賊黨不加少。且兵力以保城爲急。則村市已被焚掠。以保荆襄爲急。則房竹安康。已難兼顧。往往官兵所向。窮日追及。而賊一見卽走。旁分四竄。本欲迎頭。反成擊尾。皆由前無阻截。是以任其所之。爲今之計。欲籌恤難民而困賊匪。莫若飭近賊州縣。於大市鎮處所。勸民修築土堡。環以深壕。其餘散處村落。酌量戶口多寡。以一堡集居民三四萬爲率。因地之宜。就民之便。或十餘聯爲一堡。或數十村聯爲一堡。更有山村僻遠。不能合併作堡者。卽移入附近堡內。所有糧食牛豕什物一併收入。被難人民。卽於其中安置。搭蓋草棚。賊近則更番守禦。賊遠則出入耕作。該壯丁各保身家。巡防自必奮勇。壯丁不足。更於難民中



擇其驍健者。充當鄉勇。酌給口糧。即以代振。每保派文武幹員二三人。紳耆數人爲之董率彈壓。如此防範。未被難之戶。得有捍衛。已被難之民。得謀食息。且收養堡內之人。戶口有稽。不特可免流離。抑且振無冒濫。即其中有一二曾經入教。首鼠兩端者。亦皆有所拘束。不致附和勾結。則賊匪所至之地。皆溝壘森嚴。難以衝突。各堡以逸待勞。併力禦剿。使賊處處受敵。而人民不爲逼虜。糧食牲畜。不爲劫奪。火藥器械。不爲掠取。賊必饑餓。日就窮蹙。加以勁兵雲集。併力兜擒。而後殺一賊卽少一賊。滅一股復除一股。（按賊無可擄無可掠之故）卽如近日紳士梁友毅等。築堡團練。賊不能犯。保護鄉里十餘萬人。實有明驗。清龔太守景瀚奏議有云。竊惟邪匪滋事以來。蔓延四省。輾轉兩年。

處處有賊。處處需兵。負固則經年累月不能克。奔竄則過都歷郡不能禦。又曰川省之山。層崖峭壁。削立如城砦者，所在多有。其上有田有水。賊若據之。非數萬之衆。不能攻取。然周圍百餘里。或數十里。終未能環而圍之也。竭力仰攻。士卒損傷過半。幸而得之。賊已乘間率隊他徙矣。則又窮日夜之力以追之。而其勢常不相及。蓋賊因糧於民。無地非民。則無地非糧，官兵之糧。必須轉運。賊竄無定向。亦無定期。糧臺豈能豫設。夫馬豈能豫增。（按剿流寇不易設糧站者此也）倉卒移營。糧必遲誤。此一難也。賊皆輕身。登降便捷。而我兵烏槍弓箭火藥鉛彈。身所佩帶。不下二三十斤。行走不易。此二難也。賊皆本地之人。慣於山行。婦人孺子。亦捷若飛。

。(按軍行恆不及匪行之便捷者此也)而我兵如陝甘等處。壯健有餘。輕捷不足。登山半日。汗流氣喘。未遇賊而先困矣。此三難也。賊隨時隨地。可以休息。而我兵行必按隊。止必安營。挖壕樹棚。守卡跼牆。日夜不得安歇。此四難也。賊常飽而我兵常饑。賊常逸而我兵常勞。勝負之勢已分矣。幸而勝之。所殺者賊之後隊數十百人。或其老弱疾病。不能行者耳。其首惡及全夥。不可見也。賊之詭計。又分布數人於左右十餘里中。四面放火。使我兵疑畏。不敢遽進。及至探明。而賊蹤已遠矣。此尾追所以常不及也。於是有謂宜繞道在前。迎頭截殺者。究係空言。亦無實濟也。前後夾擊。則左右分馳，東西並攻。則南北各竄。山澗重疊。道路分歧。處處可通。頭頭是道。安所得十

餘萬之兵一一迎而擊之。即令兵多將廣。四面兜圍。而賊聚而衝，我散而守。十餘萬之兵。分布於周圍數百里之內。其勢既分。其力亦薄。賊以全力。捨命衝突。亦未有不潰而出者。故賊之往來。可以自如。我之進退。反不能自主。賊合而我兵不得分。賊分而我兵遂不能復合。焚掠裹脅。賊愈殺而愈多，疾病死亡。兵日添而日少。勦則無以爲守。守則無以爲剿。城池已在在堪虞。將領惟斤斤自保。然則爲今之計。將奈何。曰賊未至巴州。而巴州之民先去。未至通江。而通江之城已空。守土之官。雖欲效死勿去。其誰與守。此無他。民心無所恃也。故殺賊以安民也。今必先安民。然後能殺賊。（按殺賊以安民爲先）民志固。賊勢衰，使之無所裹脅。多一民。即少一賊矣。民居

奠。則賊食絕。使之無所擄掠。民存一日之糧。卽賊少一日之食矣。爲今之計。必先行堅壁清野之法。（按先安民而後能行堅壁清野之法）責成地方官。巡行鄉邑。曉諭居民。團練壯丁。建立堡寨。使百姓自相保聚。併小村入大村。移平處就險處。深溝高壘，積穀練兵。移百姓所有積聚。實於其中。賊未至。則力農貿易。各安其生。賊既至。則閉棚登陣。相與爲守。民有所恃而無恐。自不致於逃亡。別選精銳之兵。二三千名。以牽制賊勢。不與爭鋒。但尾其後。賊攻則救。賊退則追。使之進不得戰。退無所食。不過旬餘。非潰則死耳。不戰而屈人。策之上者也。（按用民之力以困賊仍須兵力以制賊此所謂兵力聯合爲用也）其要先爲「選擇良吏。」一省之中。賢而能者留之。不肖

者易之。每處各派佐雜數人。分任其事。以一道府董局事。佐以正佐數員（按皆臨時所派之委員也）講明利弊。議定章程。總其大綱。其餘道府。分路經理稽查。不過三月。可以畢事。其次則「相度形勢」。天成之險。如大成寨太平寨等處者。加卑因高。使之可守。移附近居民於其中。先藏積穀。貧者官貸其資。茅屋草棚。聽其自便。其故居仍留弗毀。賊未至時。仍可照常安業。其村莊市鎮。人烟湊集。如臨江市。普安場等處者。隨其所居。因山臨水。爲築城堡。外挖深壕。務令廣高。民居零星在外者移入之。磚石木料匠役之費。皆給於官。惟丁夫取於民。有貧乏者。量給口糧。以代賑恤。（按此爲築堡寨經費與人力之規定）其次則「選擇頭人」。山上之寨。平地之堡。人戶既多

。一切事宜。需人經理。擇其身家殷實。品行端方明白曉事者。（按寨。舉爲寨長之資格爲品行端方明白曉事八字）或紳監。或者民長。堡長。給以頂戴，（按往時有頂戴今則給以責任即可）予以鈐記。使總一寨一堡之事。其清查戶口。董視工程。經營錢糧。稽查出入。訓練丁壯。修飭守備。（按以上六語爲寨長之任務）別擇數人爲之副。各就所長。分任其事。以專責成。其次則「清查保甲」。戶口繁多。奸良莫辨。外至者。疑其爲間諜也。卽久居者。亦慮其有匪黨也。行保甲法。十家聯保。互出甘結。始准移居。匪類送官究治。其踪跡可疑。尙無確據者。另附冊尾。聽其別居自便。毋使溷入。以滋後累。其餘良民。悉使團聚。家有幾人。大小幾口。所操何業。田土若干。詳註冊

內。以便稽核。其次則「訓練壯丁」每戶抽壯丁一人。或二三人。編爲部伍。烏槍刀矛。各習一技。官爲給價。製備器械。每一堡寨。擇營中千把。或外委一員。兵三四名。使之教導。勤加訓練。有事則登陣守禦。自保鄉里。毋令出征。惟本州縣有警。或鄰堡告急。許其以半救援。其次則「積貯糧穀」(按清查訓練積穀三者均爲要着故以之次于構築堡寨後)堡寨之中。建倉數間。富家囤戶。有糧難以盡移者。官給銀收買入倉。無者買於鄰近各鄉。官兵經過。即以此糧供支。賊至閉寨。壯丁守陣。按名給糧。毋令家食。其鰥寡孤獨。貧乏殘疾。及家稍充而實無糧者。准其照冊。分別賑借。賊平之後。即爲本鄉社倉。分貯常平。一遇災歉。即可就近賑糶。其次則「籌度經費」。所有



築台挖壕。建倉買糧。置備軍械。一切守禦器具。及搭棚蓋屋之費銀。皆官給。交堡寨長。司其出入。惟倉糧之數主於官。賑借供支。官爲報銷。其餘銀均攤於堡寨居民。所有田地。分爲十年或八年。隨地丁徵還。如此有十利焉。川省無土著之民。五方雜處。其性輕于去就。故一聞警報。輒四散奔逃。民心疑懼。則千里無堅城矣。今寨堡立。聲勢聯絡。民居旣安。民志自定。父母妻子。團聚一家。無流離死亡之憂。不慮爲賊逼脅，陷於邪黨。可以保全良民。潛消賊勢。其利一也。糧皆藏於堡寨之內。所餘村落店館。皆空屋耳。賊即千里焚掠。無所得食。若攻圍堡寨。則壯丁自護身家。其守必力。又有鄰保之救援。官兵之策應。其力必不能攻陷。狂奔十餘日。非潰而四散。則

輾轉於溝瀆之內矣。區區首惡。何難就擒。可以制奔竄之賊。其利二也。據險之賊。不能不下山掠食。今民皆團聚。糧不露處。冬夏之交。野無青草。附近已無所掠。遠出則近山之堡寨。皆得邀而擊之。其勢又不敢出。坐困月餘。積糧既竭。終亦歸於死亡逃散而已。可以制負固之賊。其利三也。州縣之有鄉村。如樹之有枝葉。枝葉傷。則根本無所庇。鄉村皆爲賊所蹂躪。其城郭之不亡者。僅矣。今四面皆有堡寨。障蔽擁護。賊必不敢徑犯城郭。有急則環而救之。賊將腹背受敵。况官兵又乘其後乎。可以保障州縣。其利四也。(按此段曾節錄在前)堡寨遠者。相距數十里。近者或十餘里。官兵經過。就近供支。糧台可以不設。官無轉運之費。民無輓輸之勞。至文報往來。無須兵

勇護之。即于堡寨之在大路者。安設夫馬遞送。可以省台站之費。其利五也。每省挑選精兵三千。賊合亦合。賊分亦分。牽制其後。使之不得攻陷城堡足矣。其餘悉令歸伍。所省鹽糧。猶其小者也。兵少則差徭亦省。民受無窮之利。而營伍不致空虛。亦無虞更生他變。其利六也。守陴壯丁。惟賊至時。數日給以口糧耳。無按月之鹽糧。無安家之銀兩。其費較招募鄉勇。所省何啻天淵。愛護鄉里。朝夕相見。猶有古者守望相助之意。可以情法維繫之。不若鄉勇從徵日久。習於兇暴。怯公戰而喜殺掠。釀爲將來無窮之隱憂。其利七也。保伍時相糾察。而堡寨之長又從而稽查之。則奸宄無容身之地。其桀驁不馴如囑嚙者。亦懾而不敢肆。可以漸化爲良民。其利八也。邪教蔓延。爲

日既久。伏而未動者。正不乏人。今淑慝既分。居不相雜。冥頑者苟潛入於賊黨。可以一併殲除。其愧悔者。必安居乎故業。可以保全身命。絕後患之萌。開自新之路。其利九也。規模既定。守而勿失。遠近一體。上下同心。如網之在綱。有條不紊。如身之使臂。無令不從。無事之時。按籍而稽。瞭如也。有事之時。畫地而守。井如也。一勞永逸。數世賴之。其利十也。然而愚者。可與樂成。難於圖始。因循目下。畏難苟安。（按畏難苟安四字實古今通病）此議一出必有沮之者。一則曰騷擾反以累民也。夫擇利莫若重。擇害莫若輕。賊匪所過。焚燒房屋。殺戮人民。擄掠婦女。其慘極矣。民雖至愚。亦必明於利害。所全者大。即小有騷擾。猶當毅然爲之。况保其身家。全其

積聚。順其情之所樂。何累之有。若云奉行不善。則官吏之過。當易其人。不當廢此法。如戰場失利。豈以偶無良將。而遂永不用兵乎。一則曰迂緩不切於事也。夫欲速則不達。自去歲以來。各省所行。何一不速。何一有效。事固有不急急於目前。而收功於異日者。及今爲之未晚也。行之一縣。可保一縣。行之一府。可保一府。同時並舉。不過三月。賊在羅網之內矣。是速莫於此也。舍此以圖。其果有旦夕奏效。操券而得之策乎。一則慮其費大也。夫成大事者。不惜小費。苟能平爲。即多費亦所不惜。今州縣大者不過堡寨數十處。小者十餘處。一省所辦者。不過三四十州縣耳。哀多益寡。合計每省用銀。不過一百萬而已。後此即無所費。較之養兵養鄉勇。每月需銀百萬兩。

而靡所底止者。其費何如。且惟買糧。惟費較鉅。而糧分貯於堡寨。何異貯於州縣之倉。今各州縣。豈能不採買乎。其餘借項。分年帶徵歸款。是不獨省費。且並無所費矣。一則畏其煩難也。夫天下無難成之事。患無任事之人。今上自道府。下至堡寨之長。總理者有人。分任者有人。勞瘁不辭。纖悉具舉。何慮其煩難。且通江巴州儀隴。賊所蹂躪之處。失業難民。豈能不爲撫恤。清查戶口。修理房屋。弔生恤死。賑乏周貧。其煩難何止十倍於此。與其補救於已然之後。何如預備於未事之先乎。是數說者。皆不足以難之。然則今日急務。莫有先於此者矣。不然。不務安民。何以禦賊。民懼賊而逃。猶可言也。兵愈增則差徭愈重。師愈久則擾累愈多。數月之後。恐民見賊至。將不

逃而與之合矣。今不早爲。後悔無及。謹陳一得之愚。以俟採擇焉。檀大令萃禦賊議云。方今之患。營空倉空庫空。然轉其空而實之。蓋有道存焉。奸匪之徒。矚此三空。恣行搶劫。所過村寨。居民奔逃。無敢堵禦之者。使所過一處。卽空一處。不早爲之所。其空益深。事不可爲。蓋三空之患。猶恃有民。固其民不至於奔逃。使之各自爲守。在于檄行州縣。申明保甲。團集鄉勇。凡民之逃。生於畏賊。一人逃。羣從而起。棄其家室老幼蓄積。賊得據之。以恣其擄掠淫殺。故賊愈張而愈多。遂至於不可制。今固結居民。民有所恃。不至於畏賊。各顧其室家老幼蓄積。齊力出而禦賊。賊聞之必不敢來攻。蓋攻難於守。城堡之守。以高臨下。村寨之守。以逸待勞。故守者之一可以

敵攻者之百。凡城池以吏領之。以士民佐之。村寨以士民之有身家智略者領之。各率其子弟年少豪勇以佐之。賊必不敢入。故申保甲。集鄉勇。得寓兵於農。守望相助之遺意。不假力於營。不待饟於倉。不仰給於庫。各自爲守。不仰於官。而賊不能擾。轉其空而實之。此不易之道也。此事之行。或疑其驚惶百姓。夫百姓驚惶。由於無所倚恃。故聞賊卽驚。賊至卽逃。今使四鄉之民。各恃其村堡。都會市井之民。各恃其城郭關廂。不畏賊而怨賊。且同心共憤以攻賊。正所以安集百姓。使之有定心也。固民卽能任地。任地卽能生財。此相因之道。民心旣固。不至奔逃。耕於野爲農民。聚於堡爲鄉勇。則民皆兵也。民不散而地不荒。耕種如故。而糧有自出。是倉不空也。丁地之銀



。厥鹽之額。舉皆如舊。是庫不空也。丁去三害而獲三利。出一紙通行文書。可以收實效矣。蓋爲政之道。憲府總其大。州縣任其成。故地方有事。責成於州縣。州縣雖曰親民。亦不能以一身獨爲也。必分之士民書役以共襄其成。

## 一。保甲

清賀縣保甲規條云。保甲宜簡明核實也。〔按保甲以簡明核實四字爲經是洞悉民情者〕向來舉行保甲。多屬虛文。戶冊則臚列定名。不分良歹。門牌則隨手填寫。虛應故事。互結則人懷疑慮。不肯承當。僅於冊上。填保甲長名色。無怪地方不收實效也。〔按此數語說盡虛報

欺蔽之弊。今本縣歷各鄉。舉行保甲團練鄉約之法。要在簡而易行。使爾等樂於從事。易於辦理。其法每村設立約長甲長。大村七八人。中村五六人。小村二三人。孤村則歸入附近大村之中辦理。該約長等訂紙簿一本。開明本村一戶某人某處人。作某某生理。祖父某名。伯叔某名。子姪某名。孫某名。雇工人某名。不分土客。不論良歹。不拘單身孤寡。一齊照式開列。簿中於一村共信之人。則註公保二字。其素不安分形跡可疑之人。則不註公保二字。詳悉造齊。持送公所。本縣逐一查閱。算計某村若干家。卽面給門牌若干張。交與約長。分給各家張掛。其簿內未註明公保者。本縣存記在心。另爲稽查辦理。明周鑒台公金湯十二籌有云。向時里老則用龍鍾老疾之人。保甲則用

貧窮疴羸之輩。欲清奸而奸不清。欲核戶而戶不核。且此坊掌連。彼坊牙錯。紛絲難爲清理。毋怪乎法屢行而輟阻也。若如予「逐段分方」之法行之。（按分方卽保甲之意也）則每方中。不過數十家。每家之中。不過數人。出入閭里。朝夕相見。卽其人之面貌姓氏。尙可一見而決。至於孰良孰奸。孰貧孰富。自不得而掩矣。一值兵荒之日。卽以本方之富。而振其本方之貧。則數少易給。不以難繼爲憂。因以本方之貧。而僱於本方之富。以計功受值。不以冒食爲愧。卽有疲癯殘疾。老弱婦女。安坐白食。數亦無幾。富者亦可作功德想。而不必屑屑計之矣。

李小有云。周台公分方之法。其利有三。清查人戶之時。奸豪不得隱

冒。一也。振濟之時。本方自濟本方。更無一人得以撓越擠塞。喧叫紛爭。二也。有警之時。富者捐財。貧者效力。彼此相資。不爲浪擲。且貧民得生。內變不起三也。昔熙寧就村振濟。張詠照保糶米。徐寧孫逐鎮放散。朱文公分都支給。皆用此法。

清嘉慶五年上諭。保甲一法。原係比閭族黨之遺制。稽查奸宄。肅清盜源。實爲整理地方良方。飭令各督撫等。實心講求。妥爲辦理。但定立章程。惟在簡便易行。切而可久。方能有效。如造冊籍。務令地方公舉誠實甲長。俾司其事。不經胥吏之手。至於稽查。地方官勢難周歷四境。因公下鄉。隨時詢問。據其所言丁口。關對牌冊。或於審理詞訟時。隨時詳詰。取冊核覈。則甲長自不敢從中弊混。任意捏造。

## 清劉簾舫觀察巴縣編聯保甲章程十七條

一。巴邑三里各甲。俱經本縣選定保正。每保正一人。給予草冊一本。二筆一墨。令將所管地段。確切查明各戶姓名。作何生理。有無糧業。及戶內丁口若干。填注於草冊內。戶戶開列。不准遺漏一戶。戶內人人開列。不准遺漏一人。

二。編聯之法。每十戶爲一牌。牌內擇一人爲牌長。每十牌爲一甲。甲內擇一人爲甲長。均須年力精壯。明白端謹者。方可勝任。每十甲爲一保。設保正一人。或三四十甲五六十甲共爲一保。共設一保正亦可。

三。編聯之法。每牌十戶。若有零戶。數在三戶以內。則附於末牌之

末。如數過三戶。則與末牌勻分爲兩牌。每甲十牌。若有零牌。在三牌以內。則附於末甲之末。如數過三牌。則與末甲勻分爲兩甲。

四。該場該村有僅止數戶。不滿十戶者。即在本場本村編爲一牌。或僅止數牌。不滿十牌者。即就本場本村編爲一甲。

五。城廂內外。及場鎮市集。毋論紳士兵丁百姓及官員公館。編聯填注戶冊。

六。巴邑城市及各場鎮。半係舖家。以一舖爲一戶。注明舖主姓名。夥計幾人。其與居民雜處者。不拘居民舖戶。着於十戶中。選一端謹之人。爲牌長。如十戶俱係舖民。即就舖戶中。選一端謹之

人爲牌長。

七·路旁小店腰店客店。以一店爲一戶。菴觀寺院。以一處爲一戶。各列於附近之場中或村落牌內。

八·巴邑除城鄉及場市外。所有居民。俱係住處畸零。並無村落。其山尖嶺角。獨居一屋之戶。有隔數里或十數里絕無鄰居者。應查明相隔最近之城市。或最近之親族房主田鄰。附入牌內。

九·窮苦孤獨之民。及游手無業之徒。往往數姓或十數姓同居一院。藏垢納污。在所不免。保甲正爲此輩而設。編聯時。除同院而同姓同宗者。可併爲一戶外。若同院而俱異姓。及雖同姓而不同宗者。必須以一姓爲一戶。各填戶冊。每戶半紙。於冊尾上格填寫

此戶一院幾家字樣。但此等雜戶。頗難擇立牌長。編聯時。仍應以一院爲一戶。查明房主在內居住。則以房主出名立戶。如房主不同居，則以有妻室丁口最多者出名立戶。

十·牌甲中有平日犯竊。及習過各色邪教。並一切作奸犯科不安本分之徒。各牌衆多不敢與之同牌或不屑與之爲伍。不知編聯保甲。正爲此輩而設。倘不編聯。使成漏戶，彼反置身牌外。恃無稽查。肆無忌憚。又安用此保甲爲也。本縣爲爾牌衆等作主。務即一體編入牌中。不准一戶遺漏。准於冊內。該戶之上。蓋用自新二字戳記。以示區別。如一二年能改過則去之。

十一·甲內各戶。如有搬去遷來者。牌長查明搬往何甲何牌，遷自何甲



何牌。十日內告知甲長保正於牌冊內後幅註明。每季將搬去者門牌繳縣，遷來者稟請補給。

三。甲內各戶。如有添生幼丁及患病身故等事。牌長五日內告知甲長保正。各於牌冊內後幅註明。

三。煙戶既清。草冊造竣。保正將草冊送縣。本縣將草冊照式填寫。登於正冊。各鈐以印。正冊有二。一曰循冊。一曰環冊。每保正先給循冊一分。每年臘月封印後。送縣換給環冊。

四。正冊既定。每戶給門牌一面。每牌長給十家牌一面。每甲長。另給一牌。開列該甲長。及十家牌長姓名，俱令各將牌實貼薄板上。朝掛夕收。如有遺失。准告知保正里長。稟請補給。

五·甲內公事。隨時具稟。往返奔馳。殊非所以優待之意。今給保正每人戳記一個。甲長則五人共給戳記一個。凡係保甲中公事。准用戳遣人代遞。稟詞不必親遞。若與保甲無干者。不准擅用。違者即係多事之徒。輕則訓斥。重則嚴究。

六·本縣因公下鄉。即攜帶環冊。順道抽查。若公事稍暇。則示期分路查點。以便該保正甲長人等。齊集聽點。本縣一切夫馬飯食。俱係自備。斷不費你一錢。喫爾一飯。倘有向爾索錢者。本縣大堂設有火鑪一面。准爾鳴鑼喊稟。

七·此次編聯保甲。一切紙筆印刷費用。俱係本縣捐辦。不要爾等花費一文。爾等繳送草冊及領門牌。領循冊。并將來換領環冊。本

縣俱在大堂親收親發。不假書差之手。且隨到隨發。不須守候。倘有向爾索錢者鳴鑼喊稟。

明王文成公。申諭十家牌法云。凡置十家牌先將各家門面小牌挨審的實。如人丁若干。必查某丁爲某官吏。或生員。或當某差役。習某技藝。作某生理。或過某房出贅。或有某殘疾。及戶籍田糧等項。俱要逐一審查的實。十家編牌既定。照式造冊一本。留縣。以備查考。及遇勾攝及差調等事。按冊處分。更無躲閃脫漏。一縣之事。如視諸掌。每十家各令挨報。甲內平日習爲偷竊。及嚇唬教唆等項。不良之人。同具不致隱漏重甘結狀。應由官府爲置舍舊圖新簿。記其姓名。姑勿追論舊惡。令其自今改行遷善。果能改化者。爲除其名。境內或有

盜竊。即令此輩自相挨緝。若甲內漏報。仍并治同甲之罪。又每日各家照依牌號式。輪流沿門曉諭覺察。如此即奸僞無所容。而盜賊亦可息矣。十家之內。但有爭訟等事。同甲卽時勸解和釋。如有不聽勸解。恃強凌弱。反誣告他人者。同甲相率稟官。官府當時量加責治省發。不必收監淹滯。凡遇問理詞狀。但涉誣告者。仍要查究同甲不行勸稟之罪。又每日各家照牌互相勸諭。務令講信修睦。息訟罷爭。日漸開導。如此則小民益知爭鬥之非。而訟詞亦可簡矣。凡十家牌法。其法甚約。其治甚廣。有司果能著實舉行。不但盜賊可息。詞訟可簡。因是而修之。補其偏而救其弊。則賦役可均。因是而修之。警其薄而勸其厚。則風俗可醇。因是而修之。導以德而訓以學。則禮樂可興。

凡有司之高才遠識者。亦不必更立法制。其於民情土俗。或有未備。但循此而潤色修舉之。則一邑之治。真可不勞而致也。

賀縣保甲規條有云。戶冊既成。兼行寄甲之法。以免混入匪徒也。賀縣主弱客強。客民寄處於此者。十居六七。而山中尤衆。其中良善客民。或貿易發跡。或耕種生理。原與土著無異。如有不肖客人。以延接鄉親爲名。凡有自廣東來者不問來歷。不分良歹。一概容留。戶冊既無其名。保甲憑何稽查。今本縣特設寄甲之法。嗣後爾等客民。遇有鄉親遠來投奔者。無論久住暫住。均要查明。如實係素相認識。並非來歷不明者。帶至約長客長墟長處。說明來歷。先行寄甲。該約長等詰問明白。方可准其寄甲。即於戶冊內添註名姓住址。責成帶來之

人保結。方許在村墟居住。若從前並不認識。無端來投者。必係匪徒。立刻驅逐出門。斷斷不許寄甲容留。自後紙廠炭廠糖榨油榨。及土客民家。有來覓工者。先問其在何處寄甲。即帶至該管約長客長處。看明戶冊。有人肯保者。方准傭雇。即於冊內雇工項下。註明何處寄甲。何人保薦，如并無寄甲。輒敢容留者。照窩匪例重辦。

邁制府編查漁船保甲有云。沿湖小船。宜挨編字號。設連環保結也。查楚省江河渡駁。江划小船。與茅蓬船隻。此等船戶。皆窮苦無賴之徒。或係沿江沿湖附近村莊。或係四處混聚。未知來歷。亦無牙埠約束。黃昏深夜。巧以捕魚爲名。乘空即將過客行舟。逞志截劫。塘汎地方。因其捕魚。不便拏緝。甚有竊劫鄉村。盜已獲而無窩家。借船

以爲巢穴。如臣屬江夏縣之八吉堡地方。素稱盜藪。其故皆由附近村莊。多以捕魚爲業。家設划船茅蓬。借名爲匪。礙難查緝。臣因飭行將八吉堡一切小船。編聯字號。兩傍烙印取五船互結。一船爲匪。四船同罪。每晚點查明白方許放行。現在行之兩月。頗覺有效。臣因推廣其法。請將南北兩省。沿江近湖地方。一切小船。逐一清查。各歸就近堤岸。彼此認保。每十船具一連環保結。挨次編號。遇晚令其務在本埠一處灣泊。其有別埠別號混入者。即行查逐。每船船戶不得過二人。取魚器具。止許帶罾網等類。其叉魚之鐵鋼叉打魚之棍棒等物。概行查禁。均責令就近典史巡檢塘汛兵丁。不時清查。併令每十號船內。自行首報匪類免罪。如平日已經認保。及後爲匪。又通同徇隱。

不行首出。一船犯罪。十船連坐。如此則所有小船。彼此自相察覺。似弭盜之一法也。（按保甲每疏於船戶此辦法實爲最要）

## 三。團練

（附勤務警號賞罰）

賀縣團練規條有云。近來盜賊橫行。不但孤村受害。即大村亦往遭劫掠。緣盜賊近村。喊殺連天。使人驚懼。又分派強徒。沿門執槍喊禁。使人不敢出頭。因爲坐視搶劫。總因人心渙散。團練不行故也。又云。本縣十八里中。相度形勢。或十餘村爲一團。或數十村爲一團。（按現在可用保甲區分）每團設立約長。管理團練之事。團內大小村寨。各設極高望樓一座。大村二三樓。中村一二樓。小村一樓。孤村



則併入附近大村辦理。每村輪派二人擊梆巡查。望樓之上。安設地雷砲三個。匪盜入村。放砲三聲。鄰村及塘汛一聞砲響。立刻放砲接應，聞得三聲砲響。知是匪盜。即在望樓放砲三聲接應。村中各家。聞砲齊起。執持器械。出村四路圍截。一見大夥匪盜。攜賊逃走。伏在暗處。用木棍取下三路。向賊人腰脚橫打。隨打隨縛。公同送官。按名賞給花紅銀兩。拒捕者。登時格殺勿論。或生擒。或俱格殺。查點名數。立刻當堂賞給。如此辦理。則一村砲響。衆村環應。頃刻之間。聲聞數十里。集衆數千人。賊匪心驚胆落。何敢橫行。（按此辦法確是根本制匪之圖）

清劉簾舫觀察團練章程云。壯丁即係本村各戶農工執業之人。以本村

之人。守護本村之地。所謂民自爲守。既不勞力。亦不費財。即古者寓兵於農之意也。不得雇用游手無賴之人。如目下更夫之類。既費工食。又往往勾匪肆劫。非徒無益。而又害之。惟壯丁內實有貿易探親外出者。及紳衿耆老。力不能持械者。許其選派雇工家丁。或雇倩本村年長良民代替。仍報知董事註冊。又曰。大戶派出壯丁三四名。中戶二三名。小戶兩名一名。董事選派後。限五日內造冊。所有壯丁姓名。年歲。臉上疤記。及所習器械。逐一注明。一樣兩分。一存董事處。一送縣署。本縣立刻當堂鈐印過硃。分別給發存署。不得片刻守候。

聞呂司寇坤鄉兵救命書有云。方今天下無真兵。人人不知兵。纔說練

鄉兵。個個氣惱死。不管他日死活。且怨眼前騷擾。守土者離任之後。各有職業。只我鄉井人家。墳墓親戚。房舍田土在此。千年離不了故國。奈何不爲久遠之計也，自今以後。務要各鄉立個性命會。十月初一以後。三月初一以前。共四個月餘。除六十歲以上。十五歲以下。殘疾衰敗之人外。每一保甲。務選強壯百人。或長槍。尖槍。鱗斧。骨朶。齊眉棍。弓矢。腰刀。火銃。繩鞭。鐵鎗之類。各認一件。每日早晚習學。遇酒席，以此爲輸贏賭酒。如猜枚投壺一般振作一番。如有武藝精通。能爲領袖者。公舉到官，給帖獎賞。如此雖三五十強盜。不敢打家截道。縱使流賊攻城搶寨。亦知此處兵強人練。亦不敢生心。就來臨城亦自胆怯。不敢持久而去矣。此事民間可以自爲。有

司每月試聚衆較藝。行賞罰。以鼓舞之可耳。

又呂坤勸諭有云。凡我居民。聽我勸諭。目下歲飢盜起。却不商量一個擒拿盜賊。保護身家性命的方法。只要聽信小人。故意搖惑喧傳的虛聲。先自家慌作一團。把婦女衣貨。糧食頭畜。亂行遷移逃避。無論貧民乘機搶奪。只說爲什麼便輕易離了鄉井。今有一法。只是四個字。叫做大家齊心。從今大家立誓。日日整頓器械。操演弓箭。槍刀。神槍。火砲等件。才是備禦事件。小人虛張聲勢。捏造謠言。正要我們動。他好搶掠。略有識見的。怎肯墮他術中。若是大家齊心守護。大家齊心救援。大家齊心擒捉。看他如何搶掠。俗語云。強龍怎敵地頭蛇。我們土著居民。道路熟。任他們就是強壯。道路生疏。終怕

我們四道圍捉。若家家相扶持。村村相連絡。遇一賊來。便都出門。大家齊心向前。雖說賊頭都是好漢。他馬是沿路搶的。人是沿路裏的。真正賊徒不多。古語道得好。射人先射馬。擒賊先擒王。只用百十個好漢。手拿百十條棗棍。打他馬腿。馬倒了。個個成擒。如賊到街衢。兩旁只暗用絆馬索絆他馬。如何敢走。若搶入人家居住。如前日某村擄掠財物。污辱婦女光景。就該捨了幾間房子。一把火燒個罄盡。若在村鎮外屯住。晚間暗堆積草。周圍放火。不怕他不剿滅。何故只聽虛聲。便都逃躲。讓路。讓屋。讓酒飯與他。骨肉折散。親戚飄零。家業被搶。妻子遭辱。就中自守的。反保全無恙。豈不是勇敢當先者。可護身家性命。而慌怯逃避者。反辱身喪家之明驗哉。如今道

院父母。爲地方盡心力。募兵請兵。護守城池。催督我們團練鄉勇。且懸重賞。我們大家齊心奮勇。保固一方。奏聞九重。名留千古。至一切功令賞罰。公祖父母。自有不測之妙用也。先以此約轉相勸告。呂坤又云。鄉兵者。鄉自爲兵。共守一鄉。不隸於官者也。官兵領官糧。憑官調遣。聽主將統率。方可策應殺賊。四鄉離地寫遠。賊來先被搶掠。就使官兵。出城迎戰。未免逗留時日。况官兵那有許多。只好防守城池。安能一時四鄉策應。目今盜賊蜂起。我們鄉村。不自家齊心保守。只望官兵剿賊。恐官兵未到。而身家性命已難保矣。爲今之計。我們鄉村。約於五六里內。可聯爲一者。大家立誓同心。自相約束。臨陣大家齊心。能鼓勇爭先。殺奪賊人首級財物者。大家褒禮

稱賀。記姓名功績於冊。稟官旌賞。臨陣立脚不定。先自退逃者。記姓名退逃於冊。仍追銀入官公用。衆人稱賀有功之人時。還着他跪送酒食以示辱。兵至五百。立一勇敢當先信義孚衆者爲正。四人爲副。營兵若干。俱聽約束指揮。用鼓八面。聞鼓則進。用鑼八面，聞鑼則止。相機施行。不可違誤。

呂坤又云。教者教之以孝弟忠信。鼓動親上死長的肝腸。習者習之以武藝行陣。練熟護身殺賊的妙法。鄉間村夫。本不知兵。未免驚詫推諉。况無官長催督。誰肯帖然遵依。我想人雖村野。那個沒有好勝爭強的念頭。如今被賊搶掠家資。淫掠婦女。何故讓他。通不與他賭鬥。只因平日不曾習得護身殺賊的真武藝。真本事。一見賊先自胆怯。

常言道。藝高人胆大。可見真武藝。真本事。是你們安身立命的實在受用。何待上人督催。然後習學哉。今各齊集本村。有名鄉兵。自行立會。弓弩。槍棒。火器。陣法件件自相比試。或攢銀錢。或攢酒肉。如賭博取勝的一般。人人爭勝。自然件件高強。然後這村與那村比試。互相賭賽。如此而村村爭勝。自然有好漢出來。至臨敵之時。擒捉得勝。官府又有獎賞。比那無益賭博。豈不便宜百倍。或問攢銀錢。攢酒食。那有許多費用。試問平昔賭博。極無益極犯法之事。如何便不惜費。此乃保全身家性命。極有益極守法之事。反惜費乎。往年賽神時。兩社爭強。窮家小戶。無不竭力出錢。此徒求福於冥冥之中。不可必得之數也。人倒樂意施財。今於真本事。立刻見效。大家獲



保全之福利事。反吝惜而不爲哉。

呂坤又云。每村各擇立一總。一總下各挑送精壯好漢。或用弓矢。或  
用火砲。或用槍刀。或用悶棍。或用砲石絆索。務要有胆氣有力量。  
或有謀略。能隨機應變者。酌量村之大小。大村四五十人。中村二三  
十人。小村數十人。各立花名文冊。村村相合。多則七八百名。小則  
四五百名。如兵至五百。則火砲手一百，弓箭手一百。長槍手一百。  
砲石悶棍絆索雜兵共二百。如多至七八百。倍之可也。

劉觀察衡團練章程有云。(一)各村附近總要路口。及相離村莊較近  
之山徑河漢阨要處所。限十日內。建立望樓。以便瞭望。如係大村及  
路徑分歧所在。建造二三座。中村一二座。小村一座。(二)每望樓

壯丁八名。至少亦須六名。夜間更流巡邏。五日一換。輪流更替。以均勞逸。日則仍各執農工本業。不致曠廢。(三)望樓置備銅鑼一面。螺角一個。其各居民舖戶。每家各置銅鑼一面。如實係貧窘無力則改用竹梆亦可。(四)遇有盜匪來村。即在望樓上鳴鑼吹角。其鑼以隨手連擊不斷爲號。本村各戶壯丁。立即鳴鑼接應。其鑼亦以隨手連擊不斷爲號。各壯丁明火持械。飛出救援。(五)遇有盜警之附近各望樓各村各戶。一聞連擊不斷之鑼聲。立即鳴鑼接應。其鑼以連擊五聲爲號。各壯丁明火持械。飛赴鑼聲連擊不斷之村莊救援。(六)遇有賊盜較遠之各望樓。各村各戶。一聞五聲鑼響。立即鳴鑼接應。其鑼以連擊三響爲號。各壯丁明火持械。飛赴五聲鑼處。以次至鑼聲連

擊不斷處之村莊救援。（按設置望樓及應用法此章言之特詳）

劉衡又云。壯丁應聽董事稽查約束。如有違抗不遵。及不支更守哨與操演不力者。立提究處。

龔景瀚云。每戶抽壯丁一人或二三人。編爲部伍。烏鎗刀矛各習一技。官爲給價。製備器械。每一堡寨。擇營中千把或外委一員。兵三四名使之教導。勤加訓練。有事則發陣守禦。自保鄉里。毋令出征。惟本州縣有警或鄰堡告急。許其以半救援。（按此即以部隊中軍官及優秀士兵訓練民衆之先例也。以半赴援。尤具特識。）

曹大令自柏云。每團須定一聚集公所。無事則合一團之人。或分兩班三班。議定雙單日。輪赴公所演習武藝。空日亦可以各照家務。公私

兩得。有事則齊集隘口協力堵禦。不得偷安躲避。違者責團稽查稟究。

宋蘇文忠弓箭社課射法云。在城者分爲四社。鄉鎮每鎮立一社。村莊相近者。或三五村。或十數村。各自爲一社。聽從其便。擇寬大廟宇一所。爲講習韜略處。擇空閑平地一段。爲演習弓箭處。在城四社各聘善射者一人爲社長。武藝超羣爲社副。善書者二人爲社錄。村鎮亦然。古者士大夫亦習射澤宮。卿相之子。亦嘗戍邊。所謂有文事者。必有武備。何恥之有。每社置武經等書。時時講習。三六九習射一次。如膂力過人。家貧不能置弓矢。本社好義富家代置之。給牌優獎。社約既定。每季有司親赴各社較射一次。有射箭命中。韜略精熟。賞

本人。仍賞社長。民間集會。即以射箭賭酒。有犯罪當罰者。即以射箭多寡減等。犯罪當責者。即以射箭中否減數。有事可以禦外侮。無事可以消內憂。盜賊不敢生心。奸細聞之遠遁。（按射可增氣力。齊心志。爲古時教民要課。惟古時用箭。今則以實彈射擊描準等代之。子彈及槍枝。須由軍隊或縣府借給）。

賀縣團練規條云。各團除編號鳥槍外。另備長柄器械。或禾叉。或矛桿。或挑刀。以長爲妙。或於高埠處用石擊打。或用石灰包遙擲。各隨其便。（按此種練習。均可增加氣力。鍛鍊身體。）該約長於風雨歇工之日。夜晚無事之時。隨喚本村少年精壯之人。練習器械。本縣親自督率一團之人。擺出器械。巡行墟坊山谷。以壯先聲。（按此卽

游行搜索也。使賊人聞而胆落。倘遇夜間有事。一聞砲響壯丁齊出。老弱隨後聲喊助勢。同心併力。不許退縮。此古人守望相助之義。此爲彼援。彼爲此援。爲人卽是爲己。且有官賞可圖。如有聞砲不響應。及不持械出村者。公同指名稟究。限定每月初三日。齊集各團。約長在附近廟宇。會團一次。本縣仍梭織下鄉。每隔兩月。親帶團內數十家壯丁。出墟擺巡一次。使吾邑團練聲勢。遠近皆知。

明金文毅聲友助事宜有云。殺賊貴胆。他逆我順。若勇敢當先。一夫真可以敵萬軍。不必盡係膂力與精藝也。然獨不曰藝高胆大乎。胆而加藝。如虎戴角。人各於生業之暇。自尋爛熟者學習。每月朔日講讀聖諭之後。不拘何日。但看天氣清明。即傳單各區。聚集一所。逐區

序較。先較射。次較長槍。二者皆懸格。其及格者。爲銀牌以旌之。此外各藝。不便懸格。聽人出演。精者衆喝采。酌大觥以敬之。仍記于冊。擊射之會。冊註無主業者。賭博不悛者。倔強不如約。不受罰者。不得入。餘無良賤皆入。但分良家子與勇士爲二軍。

又云。各區內連正。別設一小粉牌。除老幼及客外者。不列。其餘皆列。于每人名下。註明其器械。一家被盜。本家鳴鑼。則本村執器械先出救護。各村鳴鑼。則各村執器械齊出救護。但救護鄰村之法。於每連內仍分兩班。留一班居守本村要地。防禦截殺。以一班赴救。預先分定。(按此辦法。最細精穩妥)每聞傳鑼聲響。人人並起。赴各連正聚集。不得亂隊。候連正照牌點驗。有一名不出者。連正率一連

之人至其家。問何故不出。送區長議罰。強不服罰者。區送約。約邀各區長共送官。卽以黨賊究。若全不在家者。卽以賊究。

明周鑒台公籌方略有云。守禦救援之法。日間演習既熟。夜間亦須演習。風雨之日又須演習。兵法所調。每變皆習。乃授以兵之意。

方方伯積團練議有云。各團相距在二十里內外者。每議一定期。於附近要隘處所。齊集會哨或施放槍礮。演試武藝。既足以壯威。並可使賊聞風遠遁。彼此認識。又得互相聯絡。方不失守望相助之意。

方積又云。團壯須年力精壯。十五以上五十歲以下者。無論是否紳士之家。有無田產。均列名充當。其外來流棍。及團長團總素不識者。不得准充。派定之後。團總另造一冊。某團長名下。管領團勇若干。



開列姓名。年齡。呈送過硃。以便不時親臨查點。倘有違抗不願入團出力者。許團總團長指名具稟治罪。又云。每團須有膽力熟道路之健足探報四名。輪流走探。如賊人在一二百里之內。即須去探。以便早爲預備。賊人若將臨境。團總團長。一面即率團勇赴卡堵禦。如有三人家以一人居守。二人赴卡。如有借故躲延者。即以軍法從事。一面飛報別團。(按一面堵守一面飛報別團此爲必要處置而事先偵察尤爲緊要)別團團總總長。迅即一面嚴守本卡。一面抽撥團勇。各隨帶器械口糧。前往援助。如有觀望遲緩誤事者。即將該團總長照軍法從重治罪。又云。倘或有事之時。團勇日夜守卡瞭望。協力堵禦。至夜間伏路巡更。尤爲緊要。必須輪流派撥以均勞逸。如有推諉偷安。及

虛應故事。不用心力者。團總團長。稽查稟究。

嚴方伯焜山防論有云。偵探不明。便至誤事。而探卒最難得其人。往往於中途逗留數日。回則糊塗捏報。若團練既行於各邑。沿邊寨總。各給木戳。凡探在本境者。其探票內必要取寨總戳記。如至隣省隣邑者。飭令於所到營縣。稟請於票內加印。寧可優給口糧。若票無戳印者。必加重懲。庶可杜道聽途說之弊矣。

嚴焜又云。近邊要隘各寨。輪提數人設卡防守。當耕作之時，百姓分佈耕種。防匪之突至。各卡於高山瞭望。偵有賊踪。放一礮。則耕作之人。盡皆收檢農器。偵賊向此路來。則放二砲。人畜皆歸寨堡。賊近則放三砲（按此規定極切實易行）寨總糾會各寨。盡整器械。集壯

丁塔禦前卡。(按此乃就山鄉而言。如平地守寨。則各歸本寨。互相聲援。以不離開本寨爲原則。)信砲既放。後卡聞聲。接放。頃刻之時。數百里間。咸知警備。賊至不放砲。與非賊至而放砲者。寨總查出。均卽稟官嚴辦。

宋蘇文忠云。逐社各置鼓一面。如有事故及盜賊。並須聲鼓勾集。若尋常社內。聲鼓不到者。每次罰錢一百。如社內一兩村。共爲一火。地理稍遠。不聞鼓聲去處。卽火急差急脚子勾喚。若盜賊入村。聲鼓勾喚不到。及到而不加入捕賊者。並罰錢三貫。如三經罰錢一百。一經罰錢三貫。而各再犯者。並送所屬嚴斷。

于清端成龍弭盜條約有云。凡遇隣村有事。保長聞鐘砲鑼聲。立刻傳

砲。各村一齊放砲。保長卽率所管村莊甲長。一面分衆。各據要路堵截。一面率衆。直赴當場救援。或當場殺獲賊頭。或要路擒獲賊頭者。每名各賞銀五錢。甲長賞銀一兩。保長賞銀二兩。如保長聞隣村放砲。不傳砲者。罪坐甲長。如保長傳砲。甲內人丁不赴援者。罪坐各家。如當場退縮。觀望不前。致賊逸脫者。罪坐保長。如分撥扼守要路。放賊脫走者。卽味受賊賄。甲長亦應治罪。法在必行。違者重究。

○（按此節賞罰最明可以爲法）

### 周制府賞罰法五條。

一·各團遇警。由保總發信簽號旗。知會各保長齊勇。簽上書明限某時到齊。誤期罰練錢二十千充公。

一。遇有大變。附近村莊急應撲救。如有遲延與託故不到者。罰該保長制錢五千充公。

一。傳遞更簽。須議賞罰。每一大團。所有各小團互相傳簽。以便稽察。倘遇賊拿獲該勇。除照案受賞外。加賞制錢一千。以示鼓勵。或傳簽有誤。將該勇坐責二十棍。即罰練長制錢一千。以充公用。

一。各團遇有盜賊。該勇首先拿獲。賞制錢十千。至拏偷農具田禾者。賞錢一千。均由公項支發。以示鼓勵。

一。捉獲小竊。不得擅行毒毆。如有夥盜強搶。格鬥被鄉勇殺傷者。例置勿論。倘鄉勇被賊毆傷。重則給養傷錢二十千。輕則伍

千。均由公項支發。

明金文毅友助事宜議罰法三條。

一。凡遇有事時。非被盜及聞盜警。雖大喜事。雖白晝。不得鳴鑼。鳴鑼者罰銀一兩。

一。遊神賽會與演戲。最爲招盜。罰銀五兩。

一。凡村寨中。無論貧富紳民。有事時輪應出守出救者。萬一有他故。必不能出。須先期覓一人代。如不出身。又無代者。各量身家。罰銀公用。

#### 四。碉寨 水柵 守禦器械

嚴方伯如煜云。盧忠烈公之備兵大名也。念賊在山西。氛甚惡。密邇

畿輔。躬巡屬境。命山居百姓。依險立寨。藏資糧器械。又槌石播木。諸禦賊之具畢備。而耕牧其中。平原無險。則用併村法。合小附大。鑿溝築土垣。餘一如山寨。令旣佈。公自爲相度。而時往來申警之。六年賊躡入西山。畿輔百姓。人自爲守。賊攻多死傷。退無所得食。大困。並力掠臨洛關。公帥師禦之。賊逃。追逐六十里。斬獲無算。賊至廣平。聞公至。即遁去。當是時。賊遇公必敗。所至清野。饑疲不支。因相戒勿犯盧公境。七年。擢公撫治鄆陽。公之撫鄆也。聞命疾至。鄆自蹂躪後。人民稀少。公招募稍集。念房竹諸山綿亘。有險可憑。用守畿南法守之。立寨併村。鄆民懲前毖後。蹂躪舉行。人有固志。數戰皆捷。羣賊一空。鄆屹然復成巨鎮。撫楚。獻忠望見盧

家旗幟。即走遁。盧公名將。功烈赫赫。而在畿輔鄆陽。得力在結寨併村。使我有所憑。賊無可掠。信乎堅壁清野。爲戡定第一要略。而疑其聚殲者之不啻夢囈也。

嚴如煜又云。賊匪自秋起事。迄於今日。所入之處必先以虛聲恐嚇。俟居民逃竄時。彼則乘虛而入。地方官雖欲禁止逃民。而逃民終不可禁。以故民心愈恐。而賊勢益張。小民無識。貴堅其志。必置之於必不可死之地。而後有不肯輕去之心。民有不肯輕去之心。而後賊無可攔入之勢。普勸居民築寨。一月修齊。賊衆行不裹糧。待掠而食。倘能絕其糧路。勢不能枵腹持矛。是以傍寨居民。俱令其將存穀積石。先行運寨。寨上多備滾石播石。並按照寨之大小。分給過山烏槍等件。



。如果賊至。各路居民。就近登寨而守。或十餘團守一寨。或數團守一寨。並諭各屬該居民等。於賊至之時勿與接戰。但堅守不動。使我四境之內。路路可通。寨寨可望。不必互相策應。而實有互相策應之勢。賊仰攻不能。掠食無所。左梗右塞。步步防人。不待驅逐而自退。○（按此論已盡禦匪之能事。法既完密。理亦精透。其依寨抗匪之法。可爲堅壁清野之原則。使處處如是。匪雖頑悍。滅之至易。）

嚴方伯又云。凡往來要路。有地勢偏仄嶽崎。不能方軌並騎者。則扼設二三礮樓。作品字形。或連珠形。子藥米薪。皆貯礮中。賊自不敢徑越。又云。西卡用單礮。要汛用礮堡。民間之作寨堡者。亦令仿之。則處處銅城鐵壁矣。

許乃釗云。修寨積谷。其利有三。百姓有寨可守。不至流徙逃亡。可以內固民志。一也。民無流徙逃亡。賊又何從裹脅。可以散除賊黨。二也。穀藏寨中。賊無糧可掠。焉能枵腹操戈。可以制賊死命。三也。有此三利。賊已在釜底中矣。然必有不能攻之寨。始可堅守不動。勿與接戰。若夫平地各堡。有必須互相救援者。形勢不同。守禦各異。是在當事者之變動不拘矣。

明正德間。山東盜起。許忠節公達令樂陵期月。令行禁止。時流賊勢熾。公預築城凌隍。貧富均役。逾月而成。又使民各築牆。高過屋檐。仍開牆竇如圭。僅可容一人。家令一壯丁。俟於竇內。其餘皆入隊伍。令曰。守吾號令。視吾旗鼓。違者軍法。又設伏巷中。洞開城門。

。末幾賊果至。火無所施。兵無可加。旗舉伏發。盡擒斬之。

許乃釗又云。藩籬者何。築牆。浚壕。造臺。建礮。聯堡。修寨。守卡。樹柵。而已。牆周於村。壕周於牆。衛牆有臺。衛堡有礮。併村築堡。依山結寨。卡以扼險。柵以詰奸。卑者高之。湮者濬之。圯者新之。廢者葺之。散者聚之。雖夷險異地。衝緩異勢。水陸異形。憑依既固。守備斯堅也。至若湖濱海口。就淺就深。鐵棧木椿。備明備暗。成法具在。又水鄉所宜亟講者。

黃六鴻保甲論云。村鎮之有牆壕。猶州邑之有城池也。所以防盜寇而固守禦。甚未可少也。然愚民狃於耽逸。憚於煩勞。往往防禦不設。卒之後悔無及。故鄉鎮村莊。建柵。築牆。浚壕之舉。不可不亟講也。

。其建柵之法。如北方鎮集。各莊大街。皆有牛車出入。南方通衢鎮市。亦有輿蓋往來。其門務須高大。安立門樓瞭台。視村鎮之方長。斜窄。大小。以爲多寡。總要四望俱見。其門樓外周遭留空道。可以通行。外設耳垣。可以護身。俱須構造堅固。挑壕宜上闊下狹。蓋上闊使人不能踰躍。下狹使人不能藏走故也。壕中水要流通。不可薪土壅積。通流則壕身不致溼漬。壅積則日久漸高。人思掘牆取徑矣。壕內所取之土。便可築牆。牆宜厚不宜薄。高須一丈。基寬五尺。由漸而縮。至頂寬三尺。建角樓瞭望之處。尤須幫築土臺。構樓其上。以便出樓守禦。其設門之處。亦不留實道。宜造吊橋。有事則拽橋閉門。甚爲嚴謹（披黃給諫之牆壕規劃。雖與新築城不侔。亦足見古時工

事自衛之精神。今之匪盜亦猶古之匪盜也。新法固宜用。而施行有效之舊法。亦不可盡廢。）

明周鑑台公實敵台之規劃云。城垣低處。全仗兩邊高臺。顧視夾擊。使賊不敢直前衝挖。其法。貴長出不貴橫闊。左右牆之下。照品字形開成銃眼。以便開放佛郎機百子銃等項火器。上留馬眼以便照看取准。銃眼之制。內狹外闊。以便左右取准。上蓋瓦屋。使兵夫得以安身。火器得蔽風雨也。各臺地步相去。不宜太近。太近則恐對放神器。自擊其城。更不宜太遠。太遠則恐矢石無力。鉛箭火藥。須備百倍。兩敵臺交相射打。則兩敵臺之間。雖守堞無人。而賊亦不敢登矣。又虛敵臺之規劃云。其法用大石厚砌臨壕一面。而虛左右之中。中有

二層。以木板爲樓。用梯上下。每層多置空眼。以便窺覘放鳥銃火箭之類。賊不知箭銃出自敵臺內也。凡賊攻城。但顧上擊。不虞旁攻。故凡轆轤尖頭木驢旱船之類。皆防上而不防下。守城者。每無如之何。任其挖掘。以致失事。若有虛臺之制。從左右夾攻。可保無虞矣。又建築突門之規劃云。兩敵臺之間。平城之下。當留二小門。如斗口大。周圍用極巨堅石砌之。僅容一人。扁身出入。其厚約五尺。門口設一陷坑。內鋪釘版。賊入即陷。方爲萬全。門中預備大砲一二十門。若賊駕行天橋折疊車之類。必抵城下始得施展。吾以大礮。直對來路。更裝迭放。賊必敗走。

又建築暗門之規劃云。城門守禦已堅。當出奇用詐。以擊解圍。宜於

兵出入便處。潛鑿城爲暗門。外存尺餘勿透。以備出兵襲敵。其制高七尺闊六尺。內施排柵。柱上施橫木搭頭。下施門。或因賊初至。營陣未整。或暮夜乘賊不覺。或賊攻城初息。或賊圍久已怠。潛出精騎啣枚擊之。擊敗亦不遠追。賊自疲而遁矣。

明戚繼光練兵紀實有云。今建空心敵臺。其制高三四丈不等。周圍闊十二丈。有十七八丈不等者。凡衝處數十步或一百步一臺。緩處或百四五十步或二百餘步不等者。爲一臺。兩臺相應。左右相救。騎牆而立。造臺法。下築基與邊牆平。外出一丈四五尺有餘。內出五尺有餘。中層高豁。四面箭窗。上層建樓櫓。環以堞口。內衛抗卒。下發大礮。外擊敵賊。賊矢不能及。敵騎不敢近。每臺百總一名。專管調度。

攻打。臺頭副二名。專管臺內軍器輜重。兩防主客軍卒。三五十名不等。

于清端兩江弭盜條約有云。操舟強劫之徒。得以肆行無忌者。總緣水面四通八達。劫奪之後。揚帆而去。絕無攔阻之故也。按大江以南之官河。水勢甚平。俱建有跨塘橋梁。遠者十餘里。近者數里不等。今酌定凡是官河大路橋梁之下。俱應設立堅固水柵。責令本地方保甲長。輪派該地甲內之人。專司啓閉。每夜定更時分。即將柵欄閉鎖。甲長鳴鑼。傳喚過往船隻灣泊汎墩處所。敲梆巡警。至天明方許放行。其戌亥子丑寅時。不許片帆行走。如各船已泊近汎墩。而仍被賊劫者。必係汎兵通同。應報官拏究。又如有外來之船。除緊急軍務兵餉等



差。許守柵人查明。果有前途營汛護送及照驗憑據外。始准放行。其餘一切船隻。俱令停泊。仍報明保甲盤詰前柵擅行放走情由。次甲報官挨究。如木柵私自放行者。亦聽下柵報官查究。至於各處支河小港口。俱應建設水柵。責令該保甲居民。輪流看管。晨昏啓閉。凡禁約事宜。一如前例。其有紆流僻汊。如果爲商民船隻所不經由。確係賊盜出沒之間道。該地方官據實詳明本部院。立椿釘塞。若水面寬闊。爲椿柵所不能施者。應關會該營汛。量撥兵船。不時往來游巡。加意偵防。均毋故違。（按此法凡河汊交錯之鄉均可仿行）

張海珊瑚濱禦備事宜有云。吾里桑麻被野。村徑百歧。苟守備一嚴。則寇盜無所措足。除嚴定守望外。再於水陸塘橋去處。樹柵爲守。日

輪三人看護。每村各劃地段。用更夫二名。曉夜巡視。皆於十家中輪值。用私錢僱者聽。

張海珊又云。寇盜之來。拒之岸則難爲功。拒之湖則易爲力。翠微北征錄。戴禁涉法不一。曲鐵爲鈎。曳之以索。謂之聚鈎。則所觸無不傷。直鐵爲針。透之於水。謂之涉針。則所過無不創。編竹爲索。紐篾爲刺。謂之水毛蝟。以錐涉者之肌。斷木爲軸。釘鐵爲錐。謂之水蒺藜。以刺水兵之脛股。以上四法。宜於淺灘。若中河深闊之處。則繫索網。以絆其權。立刀口木曲膝錐。以鑿其舟。賊安能登吾岸哉。然使賊不能來。我亦不能出。非計也。宜於聚鈎涉鐵所不施之處。插柳條。編漁滬。暗記其曲折往復之路。庶於出入有便。

周台公云。壕水有可通舟楫者。釘「品字椿」木百餘根於水中。高出水面尺許。防樓船衝突。又云用品字椿於水上。不若暗用鐵杙於水中。利器有形則易防。無形則賊必陷也。

嚴方伯如煜海防議有云。明嘉靖間。閩之漳泉。浙之溫處。傍海依山者。多以築寨堡得完。嘗取而論之。海賊所恃銃砲。能至百十步外。而不能擊洞重垣。築堡之法。外用毛石砌成。其中築土四五尺。可遮蔽銃砲。一利也。賊匪乘夜縱火。就僻村棚寮。潛蹤一炬。居民紛紛驚竄。既房屋皆在堡內。火無所施。二利也。鄉居四散。形勢單弱。難以守望相助。有堡以聚之。則多者數百戶。少亦數十家。比廬聚族。聲勢雄壯。保甲團練之法。均可就堡施行。三利也。散地難守禦。有

堡可憑。則聞警荷戈登陴。數十百人。分布敷足。四利也。民間糧食牲畜。俱納於內。堡長保副。以時稽察。買賣交易。耳目衆多。不能潛行接濟之奸。五利也。鄉間村落。相度地勢。相爲犄角。一堡有警。各堡互應。或用邀截。或行夾攻。六利也。取土之處。挖成深壕。則堡成而壕具。壕旁密栽棘刺叢竹之類。一二年後。棘刺叢生。是生成鹿角蒺藜。七利也。惟愚民可樂成。難慮始。鄉人吝工費無遠慮。若明示利害。俾令曉然於心。地方官勸諭獎勵。富者出資。貧者出力。則一二年間。環海一帶。星羅棋布。聲勢聯絡。足資捍禦矣。檀萃禦賊議有云。守備器具。須簡便易辦。半兼乎農器。耨鋤棘矜。皆足以爲守禦之資。鋤鋤刀斧之類。農家所盡有者。去短柄用長柄。

即可以守禦。去長柄用短柄。仍爲農器。日本國兵。以長竹竿著小斧頭。如牆而進。鋒銳莫當。鄱饒之民械鬥。以長貓竹削其稍。入桐油鍋煮之。比槍刀更利。鳳穎間械鬥。用齊眉棍。先以砂石灰裝入鴨蛋殼。人懷一枚。就敵先拋蛋殼。烟霧迷空。然後用棍進擊。先據上風拋蛋。無不勝者。又用長竹竿。紮深刺把於竿頭。謂之狼牙。亦輕便可用。此皆不費大錢而易辦者也。尤莫便於飛石。卽童子飛墮礫之戲。手臂之勁。能打數丈高。且遠至百步二百步。古老相傳。楊林未裁并時。尙爲縣。有賊至。民皆搬避。令某止之曰。避非計也。丁壯能走矣。老弱能盡携之走乎。男能走矣。婦女盡隨之走乎。銀鈔能帶而走矣。谷米牲畜一切能盡帶以走乎。與其盡遺於盜。歸無所宅。終不

免於死。曷若同心致死以禦賊。賊退而家室可完。吾當率先爲汝禦。乃教其民。用飛石之法。每五百人爲一排。飛石子擊之。賊驚以爲天下神石也。遂逃遁。論功陞布政使。此法尤便之。至於早晚空閒時。練而習之。以當戲具。尤少年所不厭者。

周鑑台公云，鄉農所用耨鋤鍬鏟。柴斧鐮刀。皆兵器也。外如苦竹槍。狼筈。堅木棍，獵叉。豬鈎。竹弓箭。窩弩。以及腰刀。鞭鏹。槍。雜項軍器。購諸舊貨舖者。皆宜預購。至大小水缸燭籠蠟燭香油葦蓆屎尿桶雜用之物。未易枚舉。總宜多備。

戚少保石砲說有云。石大小不等。粗可徑尺。細可徑七寸。鑿以孔。內入炸藥。築之以土。預要纏線葦筒。置於邊牆堞口。遇賊至牆下。

則燃綫入筒。以手推下。賊人所見。不過一石。以爲我拋擊不中。不再提防。藥燃石碎。有近而不傷者。有去數十丈而被擊者。敵人莫知所向。故人人自危。此守禦第一利器。且不費官帑。一時可備數千。節財威敵。誠爲妙策。

趙恭毅烏槍編號烙字法云。烏槍乃營伍器。民間原宜禁止。但湖南所屬。苗徭雜處者。已過其半。而無苗州縣。又多係深山大澤。民間向有烏槍。實爲防苗衛身之具。若驟行禁止。則匪類反得挾兇器以傷人。而良民不免束手以就斃。茲令該地方官。于木桿之上。刊州縣姓名。烙印編號。給發收存。以防急患。如有商民續請造用者。令其送官刊刻給發。

## 五·積穀經費

明周台公云。先將合城居民。矢公矢慎。按巷分方。細行查考。(按保甲之法未行則用分方法如保甲已辦則按保按甲區分即可)其擁資厚而占田多者。爲上戶。僅能自食者爲中戶。恃作而食。朝不及夕者。爲下戶。中戶俾令計口若干。約計百日之糧。平時不許浪費一粒。以待有警自食。下戶俾令計口若干。分方造冊送官。以憑臨時賑給。除鰥寡孤獨。朦朧殘疾者。得坐食公廩外。其有膂力方剛。足任驅使。每人米二升。薪資十文。受公給。任公役。不願者聽。則上無虛糜之費。下無匱乏之憂矣。至於上戶原自不同。有上上者。有中上者。有下上者。妄意室中。難以爲據。田產多寡。可以辨之。不拘在城在鄉



。無分紳弁庶民。逐一查明。視力派積。如家在萬金以上。即派積米千石。以次下之。百石而止。令各照數積完。各在本家收貯。報官親詣查驗。務一一足數。又一一實在。城內查驗明白。其米仍是各家私物。官不得取用半粒。謂之公督私藏。一遇有警。城門關閉。許照未關城時米價。稍增十分之一。以償脚耗。各聽本方下戶糴買。其有越方強糴。及有力之家。冒充下戶糴買。希爲奸利者。即許糴戶扭稟。輕則決杖。重則梟懸。官或因兵糧不足。有時取用。必照十一增加之價。如數先給銀兩。不得短欠分文。如此於民無損。而於地方有益。但須賢明有司。能以此意家諭戶曉。又酌其土俗人情。商同巨室鄉耆。議妥舉事。行之有法。如一家之人。自爲生計始善。中戶積穀。粟

亦同此。只官督私藏四字。換自積自食耳。此票極得法。按冊查田。則田不得欺隱。驗契查銀。則銀不得欺隱。按銀數之多寡。爲積穀之多寡。則確有憑據。無由規避。

龔景瀚云。堡寨之中。建倉數間。富家屯戶。有糧難以盡移者。官給銀收買入倉。無者買於鄰近各鄉。官兵經過。即以此糧供支。賊至閉寨。壯丁守陴。按名給糧。毋令家食。其鰥寡孤獨。貧乏殘疾。及家稍充而家無糧者。准其照冊分別賑借。賊平之後。即爲本鄉社倉。分貯常平。一遇災歉。即可就近賑糧。又云。糧食不准留貯故屋。以絕賊食也。賊匪所到之處。必先搜掠糧食。糧食盡搬入寨。賊不得糧。不戰自困。寨長及副長等。平時分督所屬人戶。各將所有糧石。酌留

數日食用。餘俱運入寨中。貯於自蓋房間之內。食盡赴寨再取。（按此法爲清野要訣。可以師法。）又云。寨上須有水泉。以備樵汲也。查寨中柴水兩項。最爲緊要。（按鹽亦爲不可少之物）須寨上有林木。可以斫伐爲柴。有水泉可供合寨食用。如該處並無林木水泉。則平時當多積柴草。每家備貯水之器。約計水足供多日之用方可無虞。（按寨中能鑿水井最佳）

許乃釗云。城守莫於積糧。積糧莫於自積。蓋輸之於官。雖顆粒亦有難色。貯之於家。雖崇墉誰不樂從。勿論有事時。可飽父母妻子。幸而無事。出其所藏。亦本利兼收。此其先事預圖。有益無損者也。宜定爲條例。坐以數目。限以時日。嚴以稽查。

嚴方伯如煜云。追敵之難。固限於地險。亦多由軍糧之不能接濟。賊匪隨劫隨食。不待持糧。官兵不能也。賊軍日走百數十里。官軍亦日追百數十里。而負糧夫馬。亦只能行數十里。往往兵行一日。糧行二三日始達。乾糧難以多攜，不能不停候也。（按官軍打匪。糧食接濟困難情形。此數語完全托出）供運之方。當於要道各寨。預爲儲備。蓋當官兵臨境之際。賊匪滋擾之時。設法供運。亦防匪賊截奪。地方官於寄糧寨堡。擇紳士耆民謹厚可倚者。先給運營銀兩。屬其官兵一至卽行轉運。其子弟親貫。共顧顏面。相助運送。決不致誤。此在地方司牧。平日官兵一氣。有以作其趨事赴功之誼耳。

清張惠言論保甲事例有云。保甲之法。原爲保安富戶起見。一切冊報

往來之費。既不能取給公帑。若按戶科派。即貧民不能不受其累。地方官宜勸各鄉殷實富戶。捐資輸公。即於本鄉設局存貯。公議公正首事。司其出入會計。以備領牌報冊。及修理寨柵。公事車馬之費。其有給賞。亦出於此。收貯開銷。皆聽本鄉經營。

明周鑑台公勸諭有云。兵荒交警。貧富百姓。自宜有無相通。然而不肯捐助分文者。無非欲全享其富厚也。不知饑來百姓。死亡切身。甘心應賊。導爲剽掠。則洞房曲室。非己所有。賊得焚之。朱提白蠟。非己所有。賊得捲之。粉白黛綠。嬌妻美妾。非己所有。賊得淫之。牽衣執袂。桂子蘭孫。非己所有。賊得載之。肢體髮膚。併非己有。刀俎惟賊。截解惟賊。祖宗邱墓。并非己有。發掘惟賊。皆由不能散

財之故耳。石州張鄉宦家。與盧鳳諸郡縣各鄉宦家。可爲萬古千年悔恨之鬼矣。予所以苦口勸輸者。正爲富貴之家保全性命計也。豈區區勸有餘補不足哉。

明呂坤鄉兵救命書有云。各村各家。照地畝糧食派銀。公貯聽用。時常合操訓練。遇臨陣時。每名給銀五分。如有仗義疏財。願多出者。聽。貧者免派。止令跟隨衆人出陣可也。

周天爵云。向年各團捐輸。每地一畝。捐錢三五文。耕牛一隻。捐錢一二文不等。至於騾馬等物。有捐與否。今特公議酌中。地畝以五文。牛隻以百文爲率。騾馬等物。仍給其舊。無庸更議。又云。商賈自典商起。每典捐制錢二十千。下至油槽坊。錢舖。雜貨。布店。行戶

。以次而降。至百文止。所捐之款。存貯以備公用。

方方伯積團練議有云。團內製造軍火器械。修卡挖壕。一應費用。著團長團總。協同保正向花戶勸輸。但須就其力量。秉公勸捐。既不得徇私勒索。亦不許任其違抗。務衆心咸服。如團總團長保正。稍有挾嫌勒索等事。一經花戶告發。定即從重治罪。加倍罰追。倘有誣告。亦加倍罰之。

檀萃禦賊議有云。民自爲守。貧富不同。量貧富各出資力。以保障鄉邦。不至於失敗。其爲功德至大。而自己之身家。藉衆力以保護。不至全爲拋棄。而齎盜糧。爲己爲人。交受其利。是在互相勸諭耳。

上海图书馆藏书



A541 212 0021 8394B

印營行長員委會員委事軍



